

21 January 2025

समे .18:15 Hrs

<><><><><><>

Headlines

- मुख्मन्त्री उमर अब्दुल्ला होरें राजौरी दे बडहाल ग्रांऽ दा दौरा लाइयै प्रभावित परोआरें कन्नै मलाटी कीती। उनें आखेआ जे सरकार इनें मौतें दे कारणें दा पता लाने लेई बचनबद्ध ऐ।
- अंतर मंत्रालय दी टीम बडहाल ग्रांऽ च होई दी 17 मौतें दी जांच करा करदी ऐ।
- औंदे गणतंत्र दिवस दे सरबंध्यै च जम्मू-कश्मीर च सुरक्षा बंदोबस्त निगगर करी दित्ते गए ना।
- जम्मू दे राजभवन च त्रिपुरा, मेघालय ते मणिपुर दा स्थापना दिवस मनाया गेआ। उपराज्यपाल होरें इनें राज्यें दे विकास, शांति ते खुशहाली लेई कामना कीती।
- जम्मू खित्ते च 23 जनवरी तगर हल्की बरखा ते बर्फबारी होई सकदी ऐ।

<><><><><><>

CM- Rajouri

राजौरी जिले दे बडहाल ग्रांऽ च 17 लोकें दी रहस्यमयी बमारी करी मौत होई गई ऐ। एहदे मद्देनजर मुख्मन्त्री उमर अब्दुल्ला होरें राजौरी दा दौरा लाया। अपने दौरे दौरान उनें पीड़ित परोआरें कन्नै मलाटी कीती ते अपनी संवेदना प्रकट कीतियां। उनें दुख दी इस घड़ी च सौगी परोआरें गी मदद दा भरोसा दोआया। इनें 17 मौतें करी उत्थे लोकें च डर-त्राह पैदा होई गेदा ऐ। उमर अब्दुल्ला होरें इनें मौतें पर ठूंगी चिंता जाहिर कीती ते मुकामी लोकें गी भरोसा दोआया जे इनें मौतें दे कारणें दा पता लाया जागं कई सारी एजेंसिएं आसेआ इस मामले दी जांच कीती जा रदी ऐ। उनें आखेआ।

उच्च सतह दी अंतर मंत्रालय टीम त्रै परोआरें दे 17 मिम्बरें दी होई दी मौती दे कारणें दा पता लाने लेई जांच करा'रदी ऐ। प्रशान नै जांच लेई परतिए नमूने लैने मगरा मकान गी परतिए सील करी दित्ता ऐ। एह फैसला कोटरंका दे अडिशनल डिस्ट्रिक्ट मैजिस्ट्रेट हुंदी दिक्ख-रिक्ख च लैता गेआ ऐ की जे उच्च सतह दी अंतर मंत्रालय टीम मामले दी जांच करा'रदी ऐ।

<><><><><><>

JK Security R. Day

जम्मू कश्मीर च गणतंत्र दिवस समारोह गी सुचारू ढंगै कन्नै चलाना जकीनी बनाने लेई सुरक्षा दे पुख्ता बंदोबस्त कीते गे ना। मुख्म समारोह जम्मू दे एम.ए.स्टेडियम च होग जेहदी अध्यक्षता उपराज्यपाल मनोज सिन्हा होर करगंन ते परेड दी सलामी लैंगन। मुख्मन्त्री उमर अब्दुल्ला

होर समारोह च मुख्ख परौहने होंगन। इस मौके पर सुरक्षा लेई अंतर्राष्ट्रीय सीमा ते एलओसी कश पुलस ते नीम फौजी बलें गी तैनात कीता जा'रदा ऐ ते वरिश्ठ पुलस अफसर निजी तौर पर संवेदनशील इलाकें च सुरक्षा दी समीक्षा करा'रदे न।

<><><><><><>

RD-Illumination

जम्मू कश्मीर च प्रशासन नै पूरे केन्द्र शासत प्रदेश दे सब्बने सरकारी दफ्तरें दी इमारतें गी रोगन करने ते राष्ट्रीय झंडा चाढ़ने दे निर्देश दित्ते न। जिला प्रशासन गी हिदायत दित्ती गेई ऐ जे ओहू प्रमुख सरकारी इमारत गी लाइटें कन्नै रोशन करन ते खास तौर पर राष्ट्रीय एकता दा प्रतीक तिरंगे आले रंगें पर चेचा ध्यान देन। एह्दे अलावा सरकारी मुलाजमें गी अपने अपने जिले च गणतंत्र दिवस दे अधिकारिक समारोहें च हिस्सा लैने लेई बी निर्देश दित्ता गेआ ऐ।

<><><><><><>

Sopore-Encounter

पुलस महानिरीक्षक कश्मीर जोन विधि कुमार बिरदी होरें जानकारी दित्ती ऐ जे सोपोर च ऐतबारें कोला शुरू होए दा टाकरा अज्ज मुक्की गेआ ऐ। पत्रकारें कन्नै गल्ल करदे होई आई.जी.पी कश्मीर होरें इस गल्ल दी तसदीक कीती ऐ जे सोपोर दे गुज्जपती, जालूरा च जारी अभियान इक्क फौजी जवान दी शहादत कन्नै मुक्की गेआ ऐ। एहू अभियान टकोहदी जानकारी थहोने मगरा चलाया गेआ हा जेदे कन्नै आतंकवादियें दे छप्पने आहली थाहर गी तबाह करी दित्ता गेआ ऐ। अभियान बारै होर जानकारी दिंदे होई आईजीपी कश्मीर विधि कुमार बिरदी होरें आखेआ।

<><><><><><>

Chess-Poonch

डिप्टी कमिशनर पुंछ विकास कुंडल होरें पैहली डिस्ट्रिक्ट मैजिस्ट्रेट चैस चैंपियनशिप दा अज्ज पुंछ च उद्घाटन कीता। त्रै दिनें तगर चलने आहली इस प्रतियोगिता च 70 खडारी हिस्सा लै करदे न। एहू सब्बनें खडारी बक्ख-बक्ख आयु वर्ग दे न ते इंदी इस प्रतियोगिता च हिस्सेदारी चैस गी इस खेत्तर च होर मता बढ़ावा देने च उपयोगी साबित होग। स्हाढे संवाददाता कन्नै गल्ल करदे होई डी.सी पुंछ विकास कुंडल होरें आखेआ जे चैस युवाएं दे मानसिक समर्थ गी बदांदी ऐ। उनें आखेआ।

<><><><><><>

Foundation-Day

मेघालय, मणिपुर ते त्रिपुरा दे स्थापना दिवस गी अज्ज राजभवन जम्मू च धूमधाम कन्नै मनाया गेआ। एक भारत श्रेष्ठ भारत दी भावना गी बढ़ावा देने दे उद्देश्य कन्नै इस कार्यक्रम आस्तै जम्मू-कश्मीर च रवा करदे इनें राज्यें दे विद्यार्थियें, सुरक्षाकर्मियें ते आम लोकें गी इक थाहर पर

किट्झा करिए एहू दिन मनाया गेआ। लेफ्टिनेंट गवर्नर मनोज सिन्हा होरें त्रिपुरा, मेघालय ते मणिपुर दे लोकें गी इस दिन लेई मुबारकबाद दिक्ती ते राष्ट्र निर्माण च उन्दे योगदान लेई उंदा नमन कीता। मनोज सिन्हा होरें इनें राज्यें दी तरक्की, शांति ते खुशहाली लेई कामना कीती।

<><><><><><>

Mahashivratri-Mela

डिप्टी कमिशनर रियासी निधि मलिक होरें महाशिवरात्रि 2025 मेले दी तैयारियें गी अखीरी रूप देने लेई इक बैठक दी अध्यक्षता कीती। त्रै दिनें तगर चलने आहला महाशिवरात्रि दा एहू मेला पवित्र स्थान शिवखोड़ी च 25 फरवरी थ्वां शुरू होग ते इसी इक्क भव्य उत्सव दे तौरा पर मनाया जाग। बैठक दौरान सुरक्षा, ट्रांसपोर्ट ते बाकी महत्वपूर्ण सुविधाएं पर चर्चा कीती गेई तां जे ज्हारें दी तादाद च मेले च आने आहले श्रद्धालुएं गी सुचारू ते सुरक्षित माहौल मिली सकै। प्रशासन आसेआ मेले दे आयोजन गी सब्भनें लेई इक यादगार ते शानदार रूप कन्नै समृद्ध आध्यात्मिक आहला अनुभव बनाने आस्तै दिन रातीं कम्म कीता जा करदा ऐ।

<><><><><><>

Special-Trains

उत्तरी रेलवे नै बी महाकुंभ जाने आले यात्रुएं दी सुविधा लेई श्री माता वैश्वो देवी कटरा ते प्रयागराज बश्कार 3 विशेष ट्रेनां चलाने दी घोशणा कीती ऐ। पैहली ट्रेन 24 जनवरी गी माता वैश्वो देवी कटरा स्टेशन थमां बडलै 3 बज्जियै 50 मिनट उप्पर चलोग। 25 जनवरी गी वापस परतोग। दूई ट्रेन 7 फरवरी ते त्रीहू ट्रेन 14 फरवरी गी कटरा थमां बडलै 3 बज्जियै 50 मिनटे उप्पर ते प्रयागराज थमां साढे 7 बजे 8 ते 15 फरवरी गी परतोडन।

<><><><><><>

Doda-tourism

सैलानिएं लेई सुविधा च बाद्दा करने ते पर्यावरण गी नुकसान पजाए बगैर सुविधा प्रदान करने दे मकसद कन्नै डोडा दे जिला प्रशासन नै गुलडंडा थाहर पर्यावरण गी नुकसान नेई पजाने आहले ते अपनी किस्मा दे पैहले-पैहले शौचालय परिसर दा निर्माण कीता ऐ। एहू थाहर इक मशहूर सैलानी जगह ऐ। एहू शौचालय उत्थे औने आहले लोकें दिएं जरूरतें दे कन्नो-कन्नो पर्यावरण गी बी साफ बनाई रक्खडन। एहू जत्तें प्रशासन दी बचनबद्धता गी दर्शादा ऐ। इस मौके पर बोलदे होई डोडा दे डिप्टी कमिशनर हरविंद सिंह होरें आखेआ।

<><><><><><>

Ayush-Centre

मुल्लवै दे बाकी हिस्सें आहला लेखा जम्मू-कश्मीर च बी खोले गेदे आयुष सेहत ते आरोग्य केंद्रें दा मुंडला मकसद लोकें गी अपनी सेहत ते तंदरुस्ती बारै जागरूक बनाइयै उन्दे जीवनै चा बमारिएं दे बोझ गी घट्ट करना ऐ। रामबन जिले च बी एहू केंद्र लोकें लेई विशेष कैंप लोआइयै उनेंगी डॉक्टरें, नीम डाक्टरी अमले ते स्वयंसेविएं दी सेवा उपलब्ध करा करदा ऐ। इनें कोश्टें दे

तैहत आयुष मैहकमे नै उत्थे प्राकृति जांच आहली पैहल शुरू कीती ऐ जेदे तैहत आयुर्वेद दे साब्बै लोकें दे शरीर, तसीर ते प्रकृति दी जांच कीती जा'रदी ऐ जेदा मतलब ऐ कुसै बी माहनू पर आले-दोआले दे माहौल दा केहू असर होंदा ऐ ते ओहदा सरीर ओहदे पर केहू प्रतिक्रिया दिंदा ऐ। मैहकमे नै खून दी कमी बारै जागरूकता पैदा करने ते इक नरोआ जीन जीने बारै लोकें गी समझाने लेई कोश्टां शुरू कीती दियां न। इस बारै आकाशवाणी कन्नै गल्लबात करदे होई आयुष दे सीनियर मेडिकल अफसर ते योग दे जिला कोआर्डिनेटर डॉ. मसूद इकबाल जरगर होरें दस्सेआ।

<><><><><><>

Weather

मौसम विभाग नै पेशगोई कीती ऐ जे 22 ते 23 जनवरी गी जम्मू संभाग दे पदरें इलाकें च हौली थमां दरम्याने दर्जे दी बरखा बरी सकदी ऐ ते केई उच्चे पहाड़ी इलाकें च बर्फबारी दी बी मेद ऐ। तोआई जम्मू-श्रीनगर राश्ट्री जरनैली शिड़क एनएच-44 पर गड्डिएं दी आओजाई दौनें बक्खी दा बवस्था आहले ढंगै'नै जारी ऐ। ऊआं लोकें गी एहू सलाहू दित्ती गेई ऐ जे ओहू अपनी-अपनी लेन च पूरे अनुशासन कन्नै गड्डी चलान ते दिनै दे बेल्ले गै सफर करन। तोआई राजौरी ते पुंछ जिलें गी कश्मीर घाटी दे शोपियां जिले कन्नै जोड़ने आहली ऐतिहासक मुगल रोड केई थाहरें पर भारी बर्फ किट्टी होने करी अजें बी गड्डिएं दी आओजाई लेई बंद ऐ।

<><><><><><>